

॥ तैत्तिरीय संहिता ॥

॥ द्वितीयः प्रश्नः ॥

॥ तैत्तिरीयसंहितायां चतुर्थकाण्डे द्वितीयः प्रश्नः ॥

विष्णोः क्रमोऽस्यभिमातिहा गायत्रं छन्द आ रोह
पृथिवीमनु वि क्रमस्व निर्भक्तः स यं द्विष्मो विष्णोः
क्रमोऽस्यभिश्चिहा त्रैष्टुभं छन्द आ रोहान्तरिक्षमनु वि
क्रमस्व निर्भक्तः स यं द्विष्मो विष्णोः क्रमोऽस्यरातीयतो
हन्ता जागतं छन्द आ रोह दिवमनु वि क्रमस्व निर्भक्तः
स यं द्विष्मो विष्णोः॥१॥

क्रमोऽसि शत्रूयतो हन्तानुष्टुभं छन्द आ रोह दिशोऽनु
वि क्रमस्व निर्भक्तः स यं द्विष्मः। अक्रन्ददग्निः स्तनयन्निव
द्यौः क्षामा रेरिहद्वीरुधः समञ्जन्। सद्यो जज्ञानो वि हीमिद्धो
अख्यदा रोदसी भानुना भात्यन्तः। अग्नेऽभ्यावर्तिन्नभि न आ
वर्तस्वायुषा वर्चसा सन्या मेधया प्रजया धनेन। अग्ने॥२॥

अङ्गिरः शतं ते सन्त्वावृतः सहस्रं त उपावृतः।
तासाम्पोषस्य पोषेण पुनर्नो नष्टमा कृधि पुनर्नो रयिमा

कृधि। पुनरूर्जा नि वर्तस्व पुनरग्न इषायुषा। पुनर्नः
पाहि विश्वतः। सह रय्या नि वर्तस्वाग्ने पिन्वस्व
धारया। विश्वप्स्त्रिया विश्वतस्परि। उदुत्तमं वरुण
पाशमस्मदवाधमम्॥ ३ ॥

वि मध्यमं श्रथाय। अथा वयमादित्य व्रते तवानांगसो
अदितये स्याम। आ त्वाहार्षमन्तरभूर्ध्रुवस्तिष्ठा- विचाचलिः।
विशस्त्वा सर्वा वाञ्छन्त्वस्मिन्नाष्ट्रमधि श्रय। अग्ने
बृहन्नुषसामूर्ध्वो अस्थान्निर्जग्मिवान्तमसो ज्योतिषागात्।
अग्निर्भानुना रुशता स्वङ्ग आ जातो विश्वा सद्मान्यप्राः।
सीद त्वम्मातुरस्याः॥ ४ ॥

उपस्थे विश्वान्यग्ने वयुनानि विद्वान्। मैनामर्चिषा
मा तपसाभि शूशुचोऽन्तरस्यां शुक्रज्योतिर्वि भाहि।
अन्तरग्ने रुचा त्वमुखायै सदेने स्वे। तस्यास्त्वं हरसा
तपञ्जातवेदः शिवो भवा शिवो भूत्वा मह्यमग्नेऽथो सीद
शिवस्त्वम्। शिवाः कृत्वा दिशः सर्वाः स्वं योनिमिहासदः।
हंसः शुचिषद्वसुरन्तरिक्षसद्धोता वेदिषदतिथिर्दुरोणसत्।
नृषद्वरसदतसद्धोमसदजा गोजा ऋतजा अद्रिजा
ऋतम्बृहत्॥ ५ ॥

दिवमनु वि क्रमस्व निर्भक्तः स यन्दिष्मो विष्णोर्धनेनाग्नेऽधुममस्याः शुचिषथोऽंश

च॥१॥

[१]

दिवस्परि प्रथमं जज्ञे अग्निरस्मद्वितीयम्परि जातवेदाः।
तृतीयमप्सु नृमणा अजस्रमिन्धान एनं जरते स्वाधीः। विद्वा
ते अग्ने त्रेधा त्रयाणि विद्वा ते सद्य विभृतम्पुरुत्रा। विद्वा
ते नाम परमं गुहा यद्विद्वा तमुत्सं यत आजगन्थ। समुद्रे
त्वा नृमणा अप्स्वन्तर्नृचक्षा ईधे दिवो अग्र ऊधन्। तृतीयै
त्वा॥६॥

रजसि तस्थिवाः समृतस्य योनौ महिषा अहिन्वन्।
अक्रन्ददग्निः स्तनयन्निव द्यौः क्षामा रेरिहद्वीरुधः समञ्जन्।
सद्यो जज्ञानो वि हीमिद्धो अख्यदा रोदसी भानुना
भात्यन्तः। उशिक्पावको अरतिः सुमेधा मर्तेष्वग्निरमृतो
निधायि। इयर्ति धूममरुषम्भरिभ्रदुच्छुक्तेण शोचिषा
द्यामिनक्षत्। विश्वस्य केतुर्भुवनस्य गर्भ आ॥७॥

रोदसी अपृणाज्जायमानः। वीडुं चिदद्रिमभिनत्परायञ्जना
यदग्निमयजन्त पञ्च। श्रीणामुदारो धरुणो रयीणाम्मनीषाणाम्प्राप
सोमगोपाः। वसोः सूनुः सहसो अप्सु राजा वि भात्यग्रं

उषसा॑मिधा॒नः। यस्ते॑ अ॒द्य कृ॒णव॑द्भद्रशोचेऽपू॒पं दे॒व
घृ॒तव॑न्तमग्ने। प्र तं न॑य प्र॒तरां॑ वस्यो॒ अच्छा॒भि द्यु॒म्रं दे॒वभ॑क्तं
यवि॑ष्ठ। आ॥८॥

तम्भ॑ज सौश्र॒वसे॒ष्वग्न उ॒क्थउ॒क्थ आ भ॑ज श॒स्यमा॑ने।
प्रि॒यः सूर्ये॑ प्रि॒यो अ॒ग्ना भ॑वा॒त्युज्जा॒तेन॑ भि॒नद॒दुज्जनि॑त्वैः। त्वा॒मग्ने
यज॑माना॒ अनु द्यून् विश्वा॒ वसू॑नि दधिरे॒ वार्या॑णि। त्वया॑ सह
द्रवि॑णमिच्छ॒माना व्र॑जं गोम॑न्तमु॒शिजो॒ वि व॑व्रुः। दृशा॒नो
रु॒क्म उ॒र्व्या व्य॑द्यौ॒र्दुर्म॑रुष॒मायुः॑ श्रि॒ये रु॑चा॒नः। अ॒ग्नि॒रमृ॒तो
अभ॑व॒द्वयो॑भि॒र्यदे॑नं द्यौर॑ज॒नय॑त्सुरेताः॑॥९॥

तृतीये॑ त्वा॒ गर्भ॑ आ य॑वि॒ष्ठा यच्च॑त्वारि॑ च॥२॥ [२]

अन्न॑प॒तेऽन्न॑स्य नो दे॒ह्यन॑मी॒वस्य॑ शु॒ष्मिणः॑। प्रप्र॑दा॒तारं॑
तारि॑ष ऊ॒र्जं नो॑ धेहि द्वि॒पदे॒ चतु॑ष्पदे। उदु॑ त्वा॒ विश्वे॑ दे॒वा
अग्ने॒ भर॑न्तु चि॒त्तिभिः॑। स नो॑ भव शि॒वत॑मः सु॒प्रती॑को
वि॒भाव॑सुः। प्रेद॑ग्ने ज्योति॑ष्मान् याहि शि॒वेभि॑र॒र्चिभि॑स्त्वम्।
बृह॑द्वि॒र्भानु॑भि॒र्भास॑न्मा हि॑सीस्त॒नुवा॑ प्र॒जाः। स॒मिधा॑ग्निं
दु॒वस्य॑त घृ॒तैर्बो॑धय॒ताति॑थिम्। आ॥१०॥

अस्मिन् हव्या जुहोतन। प्रप्रायमग्निर्भरतस्य शृण्वे वि
यत्सूर्यो न रोचते बृहद्वाः। अभि यः पूरुम् पृतनासु तस्थौ
दीदाय दैव्यो अतिथिः शिवो नः। आपो देवीः प्रति गृहीत
भस्मैतत्स्योने कृणुध्व९ सुरभावं लोके। तस्मै नमन्तां जनयः
सुपत्नीर्मातेवं पुत्रम्बिभृता स्वेनम्। अप्स्वग्ने सधिष्टव॥११॥

सौषधीरनु रुध्यसे। गर्भे सञ्जायसे पुनः। गर्भो
अस्योषधीनां गर्भो वनस्पतीनाम्। गर्भो विश्वस्य भूतस्याग्ने
गर्भो अपामसि। प्रसद्य भस्मना योनिमपश्च पृथिवीमग्ने।
स९सृज्य मातृभिस्त्वं ज्योतिष्मान्पुनरासदः। पुनरासद्य
सदनमपश्च पृथिवीमग्ने। शेषे मातुर्यथोपस्थेऽन्तरस्या९
शिवतमः। पुनरूर्जा॥१२॥

नि वर्तस्व पुनरग्र इषायुषा। पुनर्नः पाहि
विश्वतः। सह रय्या नि वर्तस्वाग्ने पिन्वस्व धारया।
विश्वप्स्त्रिया विश्वतस्परि। पुनस्त्वादित्या रुद्रा वसवः
समिन्धताम्पुनर्ब्रह्माणो वसुनीथ यज्ञैः। घृतेन त्वं तनुवो
वर्धयस्व सत्याः सन्तु यजमानस्य कामाः। बोधा नो अस्य
वचंसो यविष्ठ म९हिष्ठस्य प्रभृतस्य स्वधावः। पीयति त्वो

अनु त्वो गृणाति वन्दारुस्ते तनुवं वन्दे अग्ने। स बोधि
सूरिर्मघवा वसुदावा वसुपतिः। युयोध्यस्मद्वेषांसि॥१३॥

आ तवोर्जाऽनु षोडश च॥३॥ [३]

अपैत वीत वि च सर्पतातो येऽत्र स्थ पुराणा ये
च नूतनाः। अदादिदं यमोऽवसानम्पृथिव्या अक्रन्निमम्
पितरो लोकमस्मै। अग्नेर्भस्मास्यग्नेः पुरीषमसि संज्ञानमसि
कामधरणम्मयि ते कामधरणम्भूयात्। सं या वः प्रियास्तनुवः
सम्प्रिया हृदयानि वः। आत्मा वो अस्तु॥१४॥

सम्प्रियः सम्प्रियास्तनुवो मम। अयं सो अग्निर्यस्मिन्सोम
सुतं दधे जठरे वावशानः। सहस्रियं वाजमत्यं न सति
ससवान्तसन्स्तूयसे जातवेदः। अग्ने दिवो अर्णमच्छा
जिगास्यच्छा देवा ऊचिषे धिष्ण्या ये। याः परस्ताद्रोचने
सूर्यस्य याश्चावस्तादुपतिष्ठन्त आपः। अग्ने यत्ते दिवि वर्चः
पृथिव्यां यदोषधीषु॥१५॥

अप्सु वा यजत्र। येनान्तरिक्षमुर्वाततन्थ त्वेषः स
भानुरर्णवो नृचक्षाः। पुरीष्यासो अग्नयः प्रावणेभिः
सजोषसः। जुषन्ता हव्यमाहुतमनमीवा इषो मही।

इडामग्रे पुरुद॑स॑ सु॒निं गोः श॑श्वत्त॒म॑ ह॒व॑मानाय साध।
 स्यान्नः सु॒नुस्त॑न॒यो वि॒जावा॑ग्रे सा ते सु॒म॒तिर्भू॑त्व॒स्मे। अ॒यं
 ते योनि॑र॒ऋत्व॑यो यतो जा॒तो अ॒रोच॑थाः। तं जा॒नन्॑॥१६॥

अ॒ग्न आ रो॒हाथा॑ नो वर्ध॑या र॒यिम्। चिद॑सि॒ तया॑
 दे॒वत॑याङ्गि॒रस्व॑द्धु॒वा सी॑द परि॒चिद॑सि॒ तया॑ दे॒वत॑याऽ
 ङ्गि॒रस्व॑द्धु॒वा सी॑द लो॒कम्पृ॑ण छि॒द्रम्पृ॑णाथो सी॑द शि॒वा
 त्वम्। इ॒न्द्रा॒ग्नी त्वा बृ॒हस्प॑तिर॒स्मिन् योना॑वसीषदन्। ता
 अ॒स्य सू॒ददो॑ह॒सः सोम॑ऽ श्री॒णन्ति॒ पृश्न॑यः। जन्म॑ दे॒वानां॑
 वि॒शस्त्रि॑ष्वा रो॒चने॒ दिवः॑॥१७॥

अ॒स्त्वोष॑धीषु जा॒नन्॑ष्टाच॒त्वारि॑शच्च॥४॥ [४]

समि॑त॒॑ सं क॑ल्पेथा॒॑ स॒म्प्रियौ॑ रोचि॒ष्णू सु॑म॒न॒स्यमा॑नौ।
 इष॑मूर्ज॒मभि॑ सं॒वसा॑नौ सं वा॒म्मना॑सि॒ सं व्र॑ता स॒मु
 चि॒त्तान्या॑क॒रम्। अ॒ग्रे पु॒रीष्या॑धि॒पा भ॑वा॒ त्वं नः॑। इष॑मूर्ज
 यज॑मानाय धेहि। पु॒रीष्य॑स्त्वम॒ग्रे र॑यि॒मान्पु॑ष्टि॒मा॑ अ॒सि।
 शि॒वाः कृ॒त्वा दि॒शः सर्वाः॑ स्वां योनि॑मि॒हास॑दः। भव॑तं नः
 सम॑न॒सौ समो॑क॒सौ॥१८॥

अ॒रे॒पसौ॑। मा य॒ज्ञः हि॑सिष्ट॒म्मा य॒ज्ञप॑तिं जा॒तवे॑दसौ

शि॒वौ भ॑वतम॒द्य नः॑ । मा॒तेव॑ पु॒त्रम्पृ॑थि॒वी पु॑री॒ष्यम॒ग्निः
स्वे योना॑वभा॒रुखा॑ । तां वि॒श्वैर्दे॒वैर्ऋ॒तुभिः॑ संविदा॒नः
प्र॒जाप॑तिर्वि॒श्वक॑र्मा वि मु॒ञ्चतु॑ । यद॒स्य पा॒रे रज॑सः शु॒क्रं
ज्योति॑रजा॒यत॑ । तन्नः॑ पर्ष॒दति॒ द्विषो॑ऽग्ने॒ वैश्वान॑र॒ स्वाहा॑ ।
नमः॒ सु ते॑ निर्ऋ॒ते वि॒श्वरू॑पे ॥ १९ ॥

अ॒य॒स्मयं॑ वि चृ॒ता ब॒न्धमे॒तम् । य॒मेन॒ त्वं य॒म्या
संविदा॒नोत्त॑मं नाक॒मधि॑ रोहये॒मम् । यत्ते॑ दे॒वी निर्ऋ॑तिरा
ब॒बन्ध॒ दामं॑ ग्री॒वास्व॑विच॒त्यम् । इ॒दं ते॒ तद्वि॒ ष्या॒म्यायु॑षो॒ न
मध्या॒दथा॑ जी॒वः पि॒तुम॑द्धि प्रमु॒क्तः । यस्या॑स्ते अ॒स्याः क्रू॒र
आ॒सञ्जु॑होम्ये॒षाम्ब॒न्धाना॑मव॒सर्ज॑नाय । भूमि॒रिति॑ त्वा॒ जना॑
वि॒दुर्निर्ऋ॑तिः ॥ २० ॥

इति॑ त्वा॒हम्परि॑ वेद वि॒श्वतः॑ । असु॑न्वन्त॒मयं॑जमानमिच्छ
स्तेन॑स्ये॒त्यां तस्कर॑स्यान्वै॒षि । अ॒न्यम॒स्मदि॑च्छ सा तं इ॒त्या
नमो॑ दे॒वि निर्ऋ॑ते तुभ्य॑मस्तु । दे॒वीम॒हं निर्ऋ॑तिं वन्द॑मानः
पि॒तेव॑ पु॒त्रं द॑सये॒ वचो॑भिः । वि॒श्वस्य॑ या जाय॑मानस्य वेद
शि॒रःशि॒रः प्र॑ति॒ सूरी॑ वि च॑ष्टे । नि॒वेश॑नः सं॒गम॑नो॒ वसू॑नां
वि॒श्वा रू॒पाभि॑ च॑ष्टे ॥ २१ ॥

शचीभिः। देव इव सविता सत्यधर्मेन्द्रो न तस्थौ समरे
 पथीनाम्। सं वरत्रा दधातन् निराहावान्कृणोतन। सिञ्चामहा
 अवटमुद्रिणं वयं विश्वाहादस्तमक्षितम्। निष्कृताहावमवटः
 सुवरत्रः सुषेचनम्। उद्रिणः सिञ्चे अक्षितम्। सीरा युञ्जन्ति
 कवयो युगा वि तन्वते पृथक्। धीरा देवेषु सुम्रया। युनक्त
 सीरा वि युगा तनोत कृते योनौ वपतेह॥२२॥

बीजम्। गिरा च श्रुष्टिः सभरा असन्नो नेदीय इत्सृण्या
 पक्रमायत्। लाङ्गलम्पवीरवः सुशेवः सुमतित्सरु।
 उदित्कृषति गामविम्प्रफर्व्यं च पीवरीम्। प्रस्थावद्रथवाहनम्।
 शुनं नः फाला वि तुदन्तु भूमिः शुनं कीनाशा अभि
 यन्तु वाहान्। शुनम्पर्जन्यो मधुना पयोभिः शुनासीरा
 शुनमस्मासु धत्तम्। कामं कामदुघे धुक्ष्व मित्राय वरुणाय
 च। इन्द्रायाग्रये पूष्ण ओषधीभ्यः प्रजाभ्यः। घृतेन सीता
 मधुना समक्ता विश्वैर्देवैरनुमता मरुद्भिः। ऊर्जस्वती पयसा
 पिन्वमानास्मान्त्सीते पयसाभ्याववृत्स्व॥२३॥

समौकसौ विश्वरूपे विदुर्निर्ऋतिरभि चष्ट इह मित्राय द्वाविंशतिश्च॥५॥—[५]

या जाता ओषधयो देवेभ्यस्त्रियुगम्पुरा। मन्दांमि

बभ्रूणांमहः शतं धामानि सप्त च। शतं वो अम्ब धामानि
 सहस्रमुत वो रुहः। अथा शतक्रत्वो यूयमिममै अगदं
 कृत। पुष्पावतीः प्रसूवतीः फलिनीरफला उत। अश्वा इव
 सजित्वरीर्वीरुधः पारयिष्णवः। ओषधीरिति मातरस्तद्वो
 देवीरुपं ब्रुवे। रपांसि विघ्नतीरित रपः॥२४॥

चातयमानाः। अश्वत्थे वो निषदनम्पर्णे वो वसतिः
 कृता। गोभाज इत्किलासथ यत्सनवथ पूरुषम्। यदहं
 वाजयन्निमा ओषधीरहस्त आदधे। आत्मा यक्ष्मस्य नश्यति
 पुरा जीवगृभो यथा। यदोषधयः संगच्छन्ते राजानः
 समिताविव। विप्रः स उच्यते भिषग्रक्षोहामीवचातनः।
 निष्कृतिर्नाम वो माताथा यूयं स्थ संकृतीः। सराः
 पतत्रिणीः॥२५॥

स्थन यदामयति निष्कृत। अन्या वो अन्यामवत्वन्यान्यस्या
 उपावता। ताः सर्वा ओषधयः संविदाना इदम्मे प्रावता
 वचः। उच्छुष्मा ओषधीनां गावो गोष्ठादिवेरते। धनं
 सनिष्यन्तीनामात्मानं तव पूरुष। अति विश्वाः परिष्ठाः स्तेन
 इव व्रजमक्रमुः। ओषधयः प्राचुच्यवुर्यत् किं च तनुवां
 रपः। याः॥२६॥

तु आ॒त॒स्थुरा॒त्मानं॑ या आ॒वि॒वि॒शुः परुः॑परुः। तास्ते॒
यक्ष्मं॑ वि बा॒धन्ता॒मुग्रो॑ म॒ध्यम॒शीरि॑व। सा॒कं य॒क्ष्म प्र प॑त
श्ये॒नेन॑ कि॒किदी॒विना॑। सा॒कं वा॒तस्य॑ ध्राज्या सा॒कं न॑श्य
नि॒हाक॑या। अ॒श्व॒वा॒वती॑५ सोम॒वती॑मूर्जय॒न्ती- मुदो॑जसम्।
आ वि॑त्सि॒ सर्वा॑ ओष॒धीर॒स्मा अ॑रि॒ष्टता॑तये। याः फ॒लिनी॒र्या
अ॒फ॒ला अ॑पु॒ष्पा याश्च॑ पु॒ष्पिणीः॑। बृह॒स्पति॑प्रसूता॒स्ता नो॑
मु॒ञ्चन्त्व॑५हंसः। याः॥२७॥

ओष॑धयः सोम॑राज्ञीः प्रवि॑ष्टाः पृथि॒वीम॑नु। तासां॒
त्वम॑स्युत्त॒मा प्र णो॑ जी॒वात॑वे सु॒व। अ॒व॒पत॑न्तीर॒वद॑न्दि॒व
ओष॑धयः परि॑। यं जी॒वम॑श्च॒वाम॑हे न स रि॑ष्याति॒ पूरु॑षः।
याश्चे॒दमु॑प॒शृण्व॑न्ति॒ याश्च॑ दूर॒म्परा॑गताः। इ॒ह सं॑ग॒त्य ताः
सर्वा॑ अ॒स्मै सं द॑त्त भेष॒जम्। मा वो॑ रिष॒त्खनि॑ता य॒स्मै
चा॒हं खना॑मि वः। द्वि॒प॒च्चतु॑ष्पद॒स्माक॑५ सर्व॑म॒स्त्वना॑तु॒रम्।
ओष॑धयः सं व॑दन्ते॒ सोमे॑न स॒ह राज्ञा॑। य॒स्मै क॒रोति॑
ब्राह्म॑णस्त५ रा॒ज॒न्या॒रयाम॑सि॥२८॥

रपः प॒त॒त्रिणी॑र्या अ५हंसो याः खना॑मि वो॒ऽष्टा॑द॒श च॥६॥ [६]

मा नो॑ हि५सी॒ज्जनि॑ता यः पृथि॒व्या यो वा॒ दि॒व५

स॒त्यध॑र्मा ज॒जान॑। यश्चा॒पश्च॑न्द्रा बृ॒हती॑र्ज॒जान॑ कस्मै॑ दे॒वाय॑
ह॒विषा॑ विधेम। अ॒भ्याव॑र्तस्व पृथि॒वि य॒ज्ञेन॑ पय॑सा स॒ह।
व॒पां ते॑ अ॒ग्निरि॑षितोऽव॑ सर्पतु। अ॒ग्ने यत्ते॑ शु॒क्रं यच्च॑न्द्रं
यत्पू॒तं यद्य॑ज्ञि॒यम्। तद्दे॒वेभ्यो॑ भ॒राम॑सि। इष॒मूर्ज॑म॒हमि॑त
आ॥ २९॥

द॒द ऋ॑तस्य॒ धाम्नो॑ अ॒मृत॑स्य॒ योनेः॑। आ नो॒ गोषु॑
विश॒त्वौष॑धीषु॒ जहा॑मि से॒दिम॑नि॒राम॑मी॒वाम्। अ॒ग्ने तव॑
श्रवो॒ वयो॑ महि॒ भ्राज॑न्त्य॒र्चयो॑ विभाव॑सो। बृ॒हद्भानो॑ शव॑सा
वाज॑मु॒क्थ्यं दधा॑सि दा॒शुषे॑ कवे। इ॒रज्य॑न्न॒ग्ने प्र॑थयस्व
ज॒न्तुभि॑र॒स्मे रा॒यो अ॒मर्त्य॑। स द॑र्श॒तस्य॑ वपु॑षो॒ वि
रा॑जसि पृ॒णक्षि॑ सान॒सि॥ र॒यिम्। ऊ॒र्जो न॑पा॒ज्जात॑वेदः
सुश॒स्तिभि॑र्म॒न्दस्व॥ ३०॥

धी॒तिभि॑र्हितः। त्वे इषः॒ सं द॑धु॒र्भूरि॑रेतसश्चि॒त्रोत॑यो
वा॒मजा॑ताः। पा॒वक॑वर्चाः शु॒क्रव॑र्चा अ॒नून॑वर्चा उ॒दिय॑र्षि
भा॒नुना॑। पु॒त्रः पि॒तरा॑ वि॒चर॑न्नुपा॒वस्यु॑भे पृ॒णक्षि॑ रोद॑सी।
ऋ॒तावा॑न॒म्महि॑षं वि॒श्वच॑र्षणिम॒ग्नि॥ सु॒म्नाय॑ दधिरे पु॒रो
जनाः॑। श्रु॒त्कर्ण॑॥ स॒प्रथ॑स्तमन्त्वा गि॒रा दै॒व्य॒म्मानु॑षा

युगा। निष्कर्तारमध्वरस्य प्रचेतसं क्षयन्तु२ राधसे महे।
रातिम्भृगूणामुशिजं कविक्रतुम्पृणक्षि सानसिम्॥३१॥

रयिम्। चितः स्थ परिचित ऊर्ध्वचितः श्रयध्वं तया
देवतयाङ्गिरस्वद् ध्रुवाः सीदत। आ प्यायस्व समेतु ते विश्वतः
सोम वृष्णियम्। भवा वाजस्य संगथे। सं ते पयांसि
समु यन्तु वाजाः सं वृष्णियान्यभिमातिषाहः। आप्यायमानो
अमृताय सोम दिवि श्रवांस्युत्तमानि धिष्व॥३२॥

आ मन्दस्व सानसिमेकान्नचत्वारि२शब्॥७॥ [७]

अभ्यस्थाद्विश्वाः पृतना अरातीस्तदग्निराह तदु सोम
आह। बृहस्पतिः सविता तन्म आह पुषा माधात्सुकृतस्य
लोके। यदक्रन्दः प्रथमं जायमान उद्यन्त्समुद्रादुत वा
पुरीषात्। श्येनस्य पक्षा हरिणस्य बाहू उपस्तुतं जनिम तत्ते
अर्वन्। अपाम्पृष्ठमसि योनिरग्नेः समुद्रमभितः पिन्वमानम्।
वर्धमानम्महः॥३३॥

आ च पुष्करं दिवो मात्रया वरिणा प्रथस्व। ब्रह्म
जज्ञानमप्रथमम्पुरस्ताद्वि सीमतः सुरुचो वेन आवः। स
बुध्निया उपमा अस्य विष्ठाः सतश्च योनिमसतश्च विवः।

हिरण्यगर्भः समवर्तताग्रे भूतस्य जातः पतिरेकं आसीत्।
स दाधार पृथिवीं द्यामुतेमां कस्मै देवाय हविषा विधेम।
द्रप्सश्चस्कन्द पृथिवीमनु॥३४॥

द्यामिमं च योनिमनु यश्च पूर्वः। तृतीयं योनिमनु संचरन्तं
द्रप्सं जुहोम्यनु सप्त होत्राः। नमो अस्तु सर्पेभ्यो ये के च
पृथिवीमनु। ये अन्तरिक्षे ये दिवि तेभ्यः सर्पेभ्यो नमः। येऽदो
रोचने दिवो ये वा सूर्यस्य रश्मिषु। येषामप्सु सदः कृतं
तेभ्यः सर्पेभ्यो नमः। या इषवो यातुधानानां ये वा वनस्पती
रनु। ये वावटेषु शेरते तेभ्यः सर्पेभ्यो नमः॥३५॥

महोऽनु यातुधानानामेकादश च॥८॥ [८]

ध्रुवासि धरुणास्तृता विश्वकर्मणा सुकृता। मा त्वा समुद्र
उद्वधीन्मा सुपर्णोऽव्यथमाना पृथिवीं दृह। प्रजापतिस्त्वा
सादयतु पृथिव्याः पृष्ठे व्यचस्वतीम्प्रथस्वतीम्प्रथो-
ऽसि पृथिव्यसि भूरसि भूमिरस्यदितिरसि विश्वधाया
विश्वस्य भुवनस्य धर्त्री पृथिवीं यच्छ पृथिवीं दृह
पृथिवीम्मा हिंसीर्विश्वस्मै प्राणायापानाय व्यानायोदानाय
प्रतिष्ठायै॥३६॥

चरित्रायाग्निस्त्वाभि पातु म॒ह्या स्व॒स्त्या छु॒र्दिषा॒ शंत॑मे॒न॒
 तया॑ दे॒वत॑याङ्गि॒रस्व॑द्धु॒वा सी॑द। काण्डा॑त्काण्डात् प्र॒रोह॑न्ती
 परु॑षःपरु॑षः परि॑। ए॒वा नो॑ दूर्वे॒ प्र त॑नु॒ सह॑स्रेण॒ शते॑न
 च। या श॑तेन॒ प्रत॑नोषि॒ सह॑स्रेण॒ वि॒रोह॑सि। तस्या॑स्ते
 दे॒वीष्ट॑के वि॒धेम॑ ह॒विषा॑ व॒यम्। अषा॑ढासि॒ सह॑माना
 सह॑स्वारा॑तीः सह॑स्वारा॑तीय॒तः सह॑स्व॒ पृत॑नाः सह॑स्व
 पृत॑न्य॒तः। सह॑स्र॒वीर्या॑॥३७॥

अ॒सि सा मा॑ जि॒न्वा मधु॑ वाता॑ ऋ॒ताय॑ते मधु॑
 क्षर॑न्ति सि॒न्धवः॑। मा॒ध्वीर्नः॑ स॒न्त्वोष॑धीः। मधु॑ नक्तं॒मुतो॑षसि
 मधु॑म॒त्पार्थि॑व॒ रजः॑। मधु॑ द्यौर॑स्तु नः पि॒ता। मधु॑मा॒न्नो
 वन॑स्पति॒र्मधु॑मा॒ अस्तु॑ सूर्यः॑। मा॒ध्वीर्गा॑वो भव॑न्तु नः।
 म॒ही द्यौः पृ॑थि॒वी च॑ न इ॒मं य॑ज्ञ॒मिमि॑क्षताम्। पि॒पृतां॑ नो
 भरी॑मभिः। तद्वि॒ष्णोः पर॑मम्॥३८॥

प॒द॑ रु॒ सदा॑ पश्य॑न्ति सूर्यः॑। दि॒वीव॑ चक्षु॒रात॑तम्। ध्रु॒वासि॑
 पृथि॒वि सह॑स्व पृत॑न्य॒तः। स्यू॒ता दे॒वेभि॑र॒मृते॑नागाः। यास्ते॑
 अ॒ग्ने सूर्ये॑ रुचं॒ उद्य॑तो दि॒वमा॑त॒न्वन्ति॑ र॒श्मिभिः॑। ताभिः॑
 सर्वा॑भी रु॒चे जना॑य नस्कृ॒धि। या वो॑ दे॒वाः सूर्ये॑ रुचो॒

गोष्वश्वेषु या रुचः। इन्द्राग्नी ताभिः सर्वाभी रुचं नो धत्त
बृहस्पते। विराट्॥३९॥

ज्योतिरधारयत्सम्राड्ज्योतिरधारयत्स्वराड्ज्योतिरधारयत्।
अग्ने युक्ष्वा हि ये तवाश्वासो देव साधवः। अरं वहन्त्याशवः।
युक्ष्वा हि देवहूतमा२ अश्वा२ अग्ने रथीरिव। नि होता पूर्यः
सदः। द्रप्सश्चस्कन्द पृथिवीमनु द्यामिमं च योनिमनु यश्च
पूर्वः। तृतीयं योनिमनु संचरन्तं द्रप्सं जुहोम्यनु सप्त॥४०॥

होत्राः। अभूदिदं विश्वस्य भुवनस्य वाजिनमग्नेर्वैश्वानरस्य
च। अग्निज्योतिषा ज्योतिष्मान्नुक्मो वर्चसा वर्चस्वान्। ऋचे
त्वा रुचे त्वा समित्स्रवन्ति सरितो न धेनाः। अन्तरहृदा
मनसा पूयमानाः। घृतस्य धारा अभि चाकशीमि। हिरण्ययो
वेतसो मध्य आसाम्। तस्मिन्त्सुपर्णो मधुकृत्कुलायी
भजन्नास्ते मधु देवताभ्यः। तस्यासते हरयः सप्त तीरे स्वधां
दुहाना अमृतस्य धाराम्॥४१॥

प्रतिष्ठायै सहस्रवीर्या परमं विराट्स्सप्त तीरे चत्वारि च॥९॥ [९]

आदित्यं गर्भम्पयसा समञ्जन्त्सहस्रस्य प्रतिमां
विश्वरूपम्। परि वृद्धिं हरसा माभि मृक्षः शतायुषं कृणुहि

ची॒य॒मा॒नः॑। इ॒म॒म्मा हि॑सी॒र्द्धि॒पाद॑म्पशूनां सह॑स्राक्ष॒
मेध॒ आ ची॒य॒मा॒नः॑। म॒यु॒मा॒र॒ण्य॒मनु॑ ते दिशामि तेन॑
चि॒न्वा॒न॒स्त॒नु॒वो॒ नि षी॑द। वा॒त॒स्य॒ ध्राजि॑ वरुणस्य॒ नाभि॑मश्वं
जज्ञा॑नं स॒रि॒रस्य॒ मध्ये॑। शि॒शुं न॒दी॒नां॒ हरि॑मद्रि॒बुद्ध॑मग्ने
मा हि॑सीः॥४२॥

प॒र॒मे व्यो॑मन्। इ॒म॒म्मा हि॑सी॒रेक॑शफम्पशूनां क॑निकृदं
वा॒जिनं॒ वाजि॑नेषु। गौ॒र॒मा॒र॒ण्य॒मनु॑ ते दिशामि तेन॑
चि॒न्वा॒न॒स्त॒नु॒वो॒ नि षी॑द। अ॒ज॒स्र॒मि॒न्दु॒मरु॑षम्भु॒र॒ण्यु॒म॒ग्नि॒मी॒डे
पूर्व॑चित्तौ नमो॑भिः। स पर्व॑भिर्ऋ॒तु॒शः क॒ल्प॑मानो गाम्मा
हि॑सी॒रदि॑तिं वि॒राज॑म्। इ॒मं स॑मु॒द्रं श॒त॒धा॒र॒मु॒त्सं
व्य॒च्य॑मा॒न॒म्भु॒व॑नस्य॒ मध्ये॑। घृ॒तं दु॒हा॒ना॒मदि॑तिं जना॒याग्ने
मा॥४३॥

हि॑सीः प॒र॒मे व्यो॑मन्। ग॒व॒य॒मा॒र॒ण्य॒मनु॑ ते दिशामि तेन॑
चि॒न्वा॒न॒स्त॒नु॒वो॒ नि षी॑द। वरू॑त्रिं त्वष्टु॒र्वरु॑णस्य॒ नाभि॑मविं
जज्ञा॑नां रज॑सः प॒र॒स्मात्। म॒हीं सा॑ह॒स्री॑मसु॒रस्य॒
मा॒या॒म॒ग्ने मा हि॑सीः प॒र॒मे व्यो॑मन्। इ॒मा॒मूर्णा॑युं वरुणस्य
मा॒यां त्वच॑म्पशूनां द्वि॒पदां॒ चतु॑ष्पदाम्। त्वष्टुः प्र॒जानां॑ प्रथ॒मं

ज॒नि॒त्र॒म॒ग्ने॒ मा॒ हि॒ंसीः॑ प॒र॒मे॒ व्यो॑म॒न् । उष्ट्र॑मा॒र॒ण्यम॑नु॒ ॥४४॥

ते॒ दि॒शामि॑ तेन॑ चि॒न्वा॒नस्त॑नुवो॒ नि॒ षी॑द । यो
अ॒ग्निर॒ग्नेस्त॑प॒सोऽधि॑ जा॒तः शोचा॑त्पृ॒थिव्या॒ उ॒त वा॑
दि॒वस्प॑रि॒ । येन॑ प्र॒जा वि॒श्वक॑र्मा॒ व्या॒न॒त्नम॑ग्ने॒ हेडुः॑ परि॑ ते
वृ॒णक्तु॑ । अ॒जा ह्य॑ग्नेर॒जनि॑ष्ट॒ गर्भा॑त्सा वा अ॒पश्य॑ञ्जनि॒तार॑म॒ग्ने ।
तया॒ रोह॑मा॒यन्नु॒प मे॒ध्यास॑स्तया॑ दे॒वा दे॒वता॑म॒ग्रं आ॑यन् ।
श॒र॒भमा॑र॒ण्यम॑नु॒ ते दि॒शामि॑ तेन॑ चि॒न्वा॒नस्त॑नुवो॒ नि॒
षी॑द ॥४५॥

अग्ने॒ मा॒ हि॒ंसीर॑ग्ने॒ मोष्ट्र॑मा॒र॒ण्यम॑नु॒ श॒र॒भं न॑व॒ च ॥१०॥ आ॒दि॒त्यमि॑म॒न्दि॒पाद॑म्यु॒
वा॒त्स्याश्व॑मि॒ममे॑क॒शफ॑ङ्गैर॒मज॑स्र॒ङ्गव॑यं॒ वरू॑त्रि॒मवि॑मि॒मामू॑र्णायुमुष्ट्रं॒ यो अ॒ग्निर॒ग्नेः श॑र॒भम् ॥ [१०]

इन्द्रा॑ग्नी रोच॒ना दि॒वः परि॑ वा॒जेषु॑ भूष॒थः । तद्वा॑ चेति॒
प्र॒ वी॒र्य॑म् । श्र॒थ॑द्व॒त्रमु॑त॒ संनो॑ति॒ वाज॑मिन्द्रा॒ यो अ॒ग्नी स॑ह॒री
स॒पर्या॑त् । इ॒र॒ज्यन्ता॑ व॒स॒व्यस्य॑ भू॒रेः स॑ह॒स्तमा॑ स॒हसा॑
वा॒ज॒यन्ता॑ । प्र॒ च॑र्ष॒णिभ्यः॑ पृ॒तना॑ ह॒वेषु॑ प्र॒ पृ॒थिव्या॑ रि॒रिचा॑थे
दि॒वश्च॑ । प्र॒ सि॒न्धु॒भ्यः प्र॑ गि॒रि॒भ्यो म॑हि॒त्वा प्रेन्द्रा॑ग्नी॒ विश्वा॑
भुव॒नात्य॑न्या । मरु॑तो॒ यस्य॑ हि ॥४६॥

क्षये॑ पा॒था दि॒वो वि॑मह॒सः । स सु॑गो॒पात॑मो॒ जनः॑ । य॒ज्ञैर्वा॑

यज्ञवाहसो विप्रस्य वा मतीनाम्। मरुतः शृणुता हवम्।
 श्रियसे कम्भानुभिः सम्मिमिक्षिरे ते रश्मिभिस्त ऋक्भिः
 सुखादयः। ते वाशीमन्त इष्मिणो अभीरवो विद्रे प्रियस्य
 मारुतस्य धाम्नः। अव ते हेड उदुत्तमम्। कया नश्चित्र आ
 भुवदूती सदावृधः सखा। कया शचिष्ठया वृता॥४७॥

को अद्य युङ्क्ते धुरि गा ऋतस्य शिमीवतो भामिनो
 दुरह्णायून्। आसन्निषून् हृत्स्वसो मयोभून् य एषाम्
 भृत्यामृणधत्स जीवात्। अग्ने नया देवानां शं नो भवन्तु
 वाजेवाजे। अप्सवग्ने सधिष्टव सौषधीरनु रुध्यसे। गर्भे
 सञ्जायसे पुनः। वृषा सोम द्युमां अंसि वृषा देव वृषव्रतः।
 वृषा धर्माणि दधिषे। इमम्मे वरुण तत्त्वा यामि त्वं नो
 अग्ने स त्वं नो अग्ने॥४८॥

हि वृता म् एकादश च॥११॥

अपां त्वेमन्नयं पुरो भुवः प्राचीं ध्रुवस्त्रिंस्त्र्यविरिन्द्राग्नी मा छन्द आशुस्त्रिवृदग्नेर्भागो-
 ऽस्येकयेयमेव सा याग्ने जातान्निर्वृत्राणि त्रयोदश॥१३॥ अपां त्वेन्द्राग्नी इयमेव देवताता
 षट्त्रिंशत्॥३६॥ अपां त्वेमन् हविषा वर्धनेन॥

[१२]

Credits: <http://stotrasamhita.github.io/about/>